

's äjerscht

A Pfaa stäiht in da Echerstraouß,
leßt d'Pfleantschn oichihänkn.
Ich denk ma sua, wos haout dös blaouß?
Wos söllt dös Pfaa wuhl kränkn?

Und gäih draaf zou und schauas oa:
Wöi war dös Vöich zsammgricht!
An Boutzn Dreeck oan hintern Boa,
an Boutzn Dreeck in Gsicht!

Ich nimm a Hultz und kratz ganz leis,
döi Boutzn genga weg,
putz mit mein Hout - und aaf döi Weis
siaht ma blaouß nu an Fleeck.

"Dankschäi!" sagts Pfaa und knaapt und lacht
und waacht mit oin Aouher.
"Dös haout ma fei nu koiner gmacht
und bin scha dreizeah Gaouher!"

"Is gout!" soch i und gäih drei Schritt,
daou kinnt a Auto gfahrn,
fehrt ei in Dreeck, nimmt mi fast mit.
D'Leit fahrn ja wöi die Narn!

"Dös haoust davoa!" sagt daou as Pfaa.
"Dirts Menschn werds niat gscheiter!
Wennst helfm willst, dawischts dich aa!"
Und zöiht schäi langsam weiter.

's zweit

Die Hehner, döi hom aa ihr Flaouch,
wenns wuhl gout gföittert werdn.
Naou jedn A, dös is koa Fraouch,
daou möins ganz naarisch plärn.

Ma fräigt si daou, wöi hängt dös zsamm
mit dera Gagerei?
Hint kinnt as A, oft siebzych Gramm,
und vorn touts "gagagei"!

Mir hom amal a Ziewerl ghat,
daou howi oft bal grinna,
haout Oier glegt, a wahrer Staat!
Und - haout niat gagern kinna!

Bis dös mein Vatter aafgfalln is;
der haout dös Ding studiert.
"Dös Ziewerl", sagt er, "woiß i gwieß,
as Gagern hint prowiert!"

V ö i c h z e i c h r e i m l a von Otto Schemm

's dritt

Ich hock amal in Kuhlwold druam
und rauch schäi staad maa Pfeifm.
Koa Mout is unt und koa Gschra uam,
daou gäiht die Rouh niat schleifm.

Ich blinsl und reiß aaf as Maal
und stier in Gros aweng imma,
kratz oa mein Boinan und wie faal -
daou zöiht maa Pfeifm nimma!

As Spitzl! Langsam draahris o
und steck an Grosholm ei.
Wöi ich as Spitzl saawer ho,
der Holm schaut aas, o mei!

Ich schmeißnan weg und schaanan naou.
Da Pfeifmsoft hängt droa.
Daou kinnt a Ammes grennt, grad daou,
bleibt pichn mit oin Boa.

Döi beißt dort ei, waous Boa droapicht.
In Soft haouts aa mit bissn -
Helt si an Bauch, kröigt a weiß Gesicht
und - haout in d'Huasn gmacht.

's vöiert

A Storchnpaar stäiht oaneren Weiher.
Niat weit weg liegt a Foußbollföld.
Die Störchi tout a Fröschl kaier,
da Storch denkt oa saa Kartagöld.

Daou siah er, wöi saa Frau, die Emma,
allwaal zon Sportplotz üwischaut,
wöis "ach" sagt und naou nimmt ihrn Kämma,
da Wind haout ihr Frisur versaut.

"Wos haoust denn", fräigt er, "waalet sua däjäert
daou üwischaut und waalet di zierst?"

"Ma haout vo dir nu nie wos ghäjäert,
wos Schäins und Gouts! Daaßt döe niat spürst!

Schau dort, döi Manner! Döe sen Trümmer!
Hom Waadl wöi a Baam sua dick!
Döi spüln mit Bolln, sen lusti immer!"
Da Storch, der tritt an Wurm ins Gnick.

Daou schlongs an Spüler drüm in d'Boina!
Der füllt, sie möinan aassitrong.
Sua gschria haout daou araaß nu koina!
Und gschimpft wird, es is niat zon song!

Ma zert oa Knöischutz, oa dean Stutzn.
Naou liegt as Boinl endli blank.
Die Störchi tout scha olwer gutzn,
da Storch sagt blaouß: "Und deanthalm Zank?"

"Sett Waadl howi aa, niat Emma?
Denn dean sei sen ja aa niat fett!"
Sie kröigt raout Backn, sagt leis: "Gemma?"
Und er sagt: "Flöing ma hoim ins Bett!"

's fümft

A Rähgas hockt oan Stodltaoua
niat weit von Zau, sölltmas denn glaam?
Haout a alts Gsicht und graua Haoua,
an Kruapf vorn wöi a Trummltaam.

"Wos willst denn daou?" sua fräichis glei,
"in Dorf arin, vull Leit und Hund?
Daaß d'Räh dös toun, dös is ma nei,
willst fressn oder bist niat gesund?"

"Ach wos!" sagts Räh, "zon Boder willi!
Koa Buack schaut mäiher zo mir her!
Will d'Haouer faam, is aa niat billi,
wos d'Beck naou song, dös wern ma seah!"

"Zon Boder?" fräichi. "Taischt di niat?
Zon Dokter laouama äihara gfalln!
Daa Gwamp oan Hols, wöi dös aassiaht!
Dös möißat weg, und niat oamaln!"

A Blaadl nimmts vo main schön Blode,
schaut mich aweng vo untn oa.
"A räitlis Haouer, dös is Mode!
Verstähst nix, bist ja blaouß a Moa!

Weis ma an Wech! Ich ho koa Zeit!
Aaf d'Nacht is Tanz heint draaß in Wold!
Von Boder, moini, gits viel Leit,
und aaf dein Huaf daou is ma zkolt."

Ich weis an Wech und wisch maa Glatzn.
Die Rähgas dankt und stäiht glei aaf.
Oan Hols vorn glenkert dös Trumm Batzn.
Ich denk ma nea, a suara Gwaaf!

Zon Boder wills, döi dumma Kraouha!
Denkt, raouta Haouer machns schäi!
As Vöich is dumm, dös is wuhl waouher;
a Mensch tiat zoaran Dokter gäih!